

Zeitschrift: Schwyzerlüt : Zyttschrift für üsi schwyzerische Mundarte
Band: 35 (1973)
Heft: 4

Artikel: Ds Lugi-Schülti
Autor: Imesch, Ludwig
DOI: <https://doi.org/10.5169/seals-192057>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 13.03.2026

ETH-Bibliothek Zürich, E-Periodica, <https://www.e-periodica.ch>

cher und faht mit schine «Gsundheits-Sprich» a, isst eppis und schlaft wider i — grad wies mu drum ischt.

Das triibt der Josi immer äso lang, bis ds Lagolti än hohle Ton va schich gitt, wemu dra chlopft und nummu meh äs paar Tropfa ins Glas rinnunt. De steiht der Josi üf, packt d Spiis in-a Lumpu und geiht hibschi in schini Wohnig embrüf. Am nechschtu Tag gseht mu nu mit dum Chieli und der «Stroba» am Tschuggu-Stutz. Der Josi ischt va schiner «Reis» zerrugg...

Ditzmal düüchts du Josi, är mege weniger Glesär verliidu als suschter. Der Wii ischt doch güet, ehner besser als der fädrige — und doch — är geiht nit rächt embri. Fascht müess är schich zwingu, schini Gsundheits-Sprich fircher zbringu.

«Gsundh...!» Der Räscht bliibt mu im Hals bhangu.

Pletzli is fiischer um ihnu. Ds Glas kiit uf du Tisch und erleschot d Cherza. Jetz is wirklich fiischer im Chäller. Aber das merkt der Josi nimme. Är ischt jetz anam Ort, wa-n-är nimme äso alleinig ischt — wa-n-är glickliche ischt wie suschter noch nie...

Wa der Josi dizmal meh als zwei Wuche lang äwägg ischt, gehntsch in ds Hiischi bim Thel-Tschuggu ga lotzu, ob är eppis Schriftlichs hinnerla heigi. Schi stolprunt der ds Hiischi, finnt aber nix, wa ihne seiti, waasch du Josi sellti süechu. Aber ändli finntsch nu doch. —

Eine bischmot pletzli: «Der arm Kärli!» Und alli sägunts noch emal: «Der arm Kärli!» Aber das verspeetot Mitleid cha dum Josi nimme hälfu...

Ds Lugi-Schütti

Im halbu Oberwallis heintschnu nummu unner dischum Namo bkennt. Fascht niemo hett gwisst, dass är eiguntli annerscht gheissu hett. Aber äs hett schinum Uber-Namo öü alli Ehr gmacht! Hunnerti luschtigi Gschichtjini hetts Lugi-Schütti verzellt, wa hinnerna und vorna erdeichti gsi sind. Und Streicha hetts gspillt — fascht wie der beriehmte Till Eulenspiegel.

Ds Luschtiga ischt gsi, alli heint gwisst, dass ds Lugi-Schütti schwindlot und leigot; aber immer wider sind än Hüüfo Liit uf schini

Im Grund gnu ischt ds Lugi-Schüli än güetmietige, weichhärzige Kärli gsi, wa keinum Mänsch, nit ämal anam Tierli zleid gita hett. Aber ds Leigu und ds Schwindlu ischt äso schini zweitei Natur gsi, dass sus äs sälbsch nit ämal gmerkt hett, obs än Lugi old d Wahrheit verzellt hett. Sältu aber hetts ds Schüli darum glogu, fär schich zberiichru . . .

Ämal ischt ds Schüli uf der altu Landbriggu z Vischp dum Dokter bigägnut. Der hett du Schwindler güet bkennt. Will är aber hiitu äso äs trüürigs Gsicht gmacht hett, seit der Dokter:

«Po lotz jetz abu, ds Schüli! Bischt chrank?»

Ds Schüli macht, wie wenns ds Brillu miessti verha.

«Ich? Nei, ich nit — aber d Alti vam Präsi.»

Der Dokter lüegt du Schül diitlicher a. Leigots ächt — old seits ächt ditzmal dWahrheit?

«Is de schlimm?» fregt är derna.

«Di macht nimme lang. Aber — Iehr gsehts sus de!» Und scho ischt ds Lugi-Schüli äwägg.

Der Dokter uberleit än Bitz. Derna macht är schich uf du Wäg. Obuna im Derfji ischt d Frouw vam Präsi eini va de erschtu, wa dum Dokter bigägnut. Dia ischt purlimunter, das gseht mu ra va wiitum a.

Aber äs alts Chiehli sigi gar nit güet zwääg, seitsch und ischt ganz verwundroti, dass der Dokter kopfschittlundu wiitergeiht.

Äs anners Mal is der alt Dekan gsi, wa dum Schüli uf du Liim gigangu ischt. Das ischt eine va dene Heeru gsi, wa gärü än Gspass gha heint.

«He, Schüli», rieht är lachunda us dum Pfarrhüüs-Pfeischter, «weischt hiitu kei Lugi?»

Ds Schüli bliibt sta, riibt d Händ, lüegt uf d Siita und seit mit zittrunder Stimm: «Ich — än Lugi? Aber, Herr Dekan! Ich leigu doch nit — old emmil fascht nie. Und hiitu — hiitu, nei hiitu ischt mer nit ums Leigu.»

Der Dekan lachot.

«Tüe jetz nit äso schii-heilig! Du hescht sicher hunnert Lugine pereit! Verzell eppis!»

Dum Schüli rinnunt pletzli zwei dicki Träne uber di Pagge embri. Griinundu seits:

«Äs cha ja si, dass mer hienta eppis entwitscht, was nit grad äso wahr ischt wie di Bibil. Aber hiitu — nei, hiitu —»

Ds Schüli faht a brillu.

Jetzt erschlipft der Dekan.

«Po, he! Was ischt de? Hetts äs Unglick gigä?»



Zeichnung aus dem «Walliser Jahrbuch».

«Das cha mu woll sägu», seit ds Schülti schnipfundu und wischt mit dum Ermil ds Öüguwasser ab. «Iehr bkennet doch du Chaschtla z Laldu. Än Schlag hett denu güetu Maa gitroffu. Aber jetz müess i sofort zum Dokter.»

Und scho ischt ds Schülti äwägg gsi.

Der Dekan lüegot mu verdattrote na, bschliesst ds Pfeischerter — und geiht was gischt was hescht — üf z Laldu.

Der Chaschtla hockt uf dum Löübilti und röükt di Pfiifa. Bim Holzspaltu heigi är schich än Schlag uf ds Chnew gigä, seit är, wa nu der Dekan fregt, wies mu gengi.

«Jetz hani mini Lugi», lachot düe der Dekan und verzellt dum Chaschtla, wie ihnu ds Schülti gspränggot heigi.

Anar Pfarr-Chechi im Vispertall hett ds Schülti än güete Streich gspillt. Dia ischt än firchterliche Giiz-Chrago gsi. Äs Tagsch chlopfots an der Port vam Pfarrhüüs. Kei Mänsch hetti ds Schülti

bkennt, wills än brandschwarze Bart umgheicht und d Stimm ver-
stellt hett.

Fär as Weisu-Hüüs tiegi äs Gäld und Äswaare bättlu, seit ds Schülti
der Pfarr-Chechi. Di armu Weisini heigi sus bitter netig.

«Iehr cheibo Bättlera», fuchtot d Jungfrouw, «tiet Iehr lieber ga
schaffu!»

Und scho hettsch di Port züegschlagu.

Ds Schülti wartot embitz und chlopfet de wider. Ditzmal tüets flingg
än Füess zwischunt di Port stellu, so dass d Chechi nimme cha
züetüe.

«Heit Erbarme mit dene arme Weisini, güeti Frouw!»

«Nix gibi, gar nix! Machet jetz, dass Iehr äfort chomet!»

Ds Schülti laht nit lugg.

«Deichet an Ewwi ewigi Rüew! Di güetu Wärch chummunt eim de
dana-uber äntgägu. Iehr heit sus sicher öü netig.»

«Das geiht Ew än Dräck a. Ich tüe scho Güets, we-ni sicher bi, dass
sus d Richtigu perchumunt. So — und jetz müess ich ga chochu.»

Jetz chunnt der Pfarrheer üsser. Är hett denu lüütu Dischput
gkehrt.

«Loset, Marjosa, gätt dem Maa eppis fär di Weisini. Wier verhungre
darum no lang nit», bifilt är schiner Hüshälter.

Dum Schülti gitt är äs Kuvärt.

«Da sätt. Äs hett än paar Franggu dri!»

Ds erscht Mal in schinum Läbu weiss ds Schülti nit, was äs soll sägu
und machu. Äs stottrot und tschuttlot:

«Ver — vergälts ne der Lieb Gott, Herr Pfarrer! Ich will — ich tüe —
ich —»

«Scho rächt, nämmets nummu! Di Weisini heints sus sicher netig!»
Unnerdessi hett d Marjosa än Tuggol Chees, Fleisch, Hamma und
Wurscht zämmuntgipackt und gitts sus dum Schülti.

«So — und jetz geht! Ich ha nit länger Ziit. Und das leht ne la
gseits si: Alli Täg chenne öü wier nit gä!»

Zer Ehr vam Schülti miess wer sägu, dass äs in der Nacht alls, was
zämmuntgibättlot hett, ischt vor di Port vam Weisu-Hüüs ga dar-
leggu.

Dum Pfarrheer hett äs spetär än Brief gschribu und mu dari alls er-
klehrt. «Nummu fuf Franggu hani zerrugg gibhaltu — fär mini
Spese!» — hetts zundroscht im Brief gheissu.

Der Pfarrheer hett schiner Chechi lang nix derva gseit, suschter
hetti är de kei güete Läbtage meh gka. Aber äswie ischt das
Geschichtji doch unner ds Volch cho...

Äs anners Mal ischt äs ganzus Derfji uf du Schwindol vam Schülti
igkiit.



Zeichnung aus dem «Walliser Jahrbuch».

Mit zwei eltre Junggsellu, wa nit grad ds Pulver erfundu heint, hett ds Schüti Beim gfelt. Di beed heint äxtra zwenig zTriichu mitgnu, fär dasch de va der güetu Lafnetscha chenne laffu, wa ds Schüti in schiner Batillu gka hett.

Ische Schül hett das bald gmerkt. Was Mittag liitot, hett äs, ohni dass di zwei andru das gseh heint, bim Brunnji ds Wasser abgestellt und schini Batilla äso agreisot, dass der Wii ischt zum Rohr üsser grunnu.

Was darmit isch fertig gsi, riefts de andre:

«Chommet abu! Da chunnt ja Wii statt Wasser üsser!»

Di beed sind wie der Blitz bim Brunnji und triichunt. Schi stossunt änandre äwägg und triichunt und triichunt, bis nix meh chunnt — äbu will di versteckti Batilla leeri ischt.

Fär di zwei ischt das äs Wunner. Und ds Schüti heizot ne no i.

«Frili ischt das äs Wunner! Deichet abu — Wii chunnt statt Wasser zum Rohr üsser! Und de grad zmittsch uber Tag. Wenns no zMitternacht weri! Deichet, wievill de müess cho!»

«Glööbscht, zMitternacht chome noch meh Wii fircher?»

Ds Schüli neitot mit dum Chopf.

«Suschter gitts äso eppis nummu zMitternacht.»

Di beed andru sägunt keis Wort meh. Jede deicht: Hina zMitternacht gani de ga lotzu...

Aber schi megunt ihro Gheimnis nit gibhaltu. Am Abund weiss sus ds ganz Derfji, dass bim Boozu-Brunnji zMitternacht Wii statt Wasser fircher chome.

Was fiischer ischt, gehnt alli mit Batille, Mälchtre und andre Gschirr äwägg. Schi redunt keis Wort mit änandre. Schi megunt keim denu Wii gunnu. Jede will fär schich sovill wie meglich ga richu.

Wasch bim Brunnji achummunt, finnutsch än Zättil. Daruf steiht:

«Än Grüess vam Schüli. Triichet Wasser, dascht noch gsunner!»

Äs Ziitji hett mu ds Schüli nimme im Derfji gseh. Dascht öü besser gsi. Schi hetti sus in der erschtu Teibi sicher halb erschlagu...

Mit schine Luginu hett sus äso wiit gibrungu, dass mu zletscht kei Mänsch me äs Wort giglööbt hett. Äso is de passiert, dass alli wider ana Schwindol gideicht heint, wasch gkehrunt, ds Schüli sigi am Stärbu.

«Das hetts öü scho mängsmal gheissu. Jedesmal is a Lugi gsi und hett ds Schüli nisch nummu üsglachot. Ob wier scho welle cho erpu, hetts nisch de gfregt.»

Äso heint d Liit gredot und niemo ischt ga lotzu, wies dum Schüli gegi.

Düe gkehrt aber än Nachpüür, wie äs jammrot und piischtot. Jetz geiht der doch ga lüegu. Woll, woll — ditzmal is Ärescht, deicht der Nachpüür und reicht du Pfarrheer.

Wa der zum Schüli an ds Bett chunnt, gseht är sofort, wie spaat dass äs ischt.

Ds Schüli lotzt du Heer a und meint:

«Ditzmal schwindlot ds Schüli nimme, gältet nummu. Ditzmal — ich gspiru-sus, äs ischt ds Letschta. Ich — ich mehti biichtu.»

Ds Schüli hett schini Sach gmacht, hett än riewige Tod gka und än scheeni Biärdigung. Im Grund gnu heints sus alli güet megu.

Du letschtu Streich hett ds Schüli schine habgiirige Verwandtu gspillt: Alls, was gka hett, hetts de Arme vermacht. Di heint sus dazumal, was noch kei Alters-Unnerstizig gigä hett, netig gka und heint dum Schüli mängs «Gottbignad!» gigä.

Und das hett ds Lugi-Schüli sicher öü netig gka...